

中州名賢集



中州名賢集



國朝中州名賢集卷六

敬庵張先生文鈔目錄

條陳教習庶吉士摺

雍正二年

請羅欽順從祀孔廟摺

雍正二年

聖人可學而至論

與毛心易書

答陳玉立書

答同年陳宮詹書

與蔡聞之書

與冉永光檢討書

答陳滄洲書

答宋藩司書

二程粹言序

朱子學的序

濂洛關閩書序

名儒粹語總序

立德部總序

黃勉齋文集序

薛文清公讀書錄序

胡敬齋居業錄序

陸稼書文集序

名儒文集二刻序

石徂徠文集序

文文山集序

陳布衣文集序

楊大洪集序

困學錄序

鰲峯書院記

紫陽書院碑記

楚南湘潭後學黃舒昂編輯

國朝中州名賢集卷六

敬庵張先生文鈔

條陳教習庶吉士摺

雍正二年

爲遵

旨條陳事竊惟經明行修乃稱儒者文章爾雅斯號通
才是以聖賢之道具在六經而濂洛關閩宋儒性理諸
書則皆羽翼經傳闡明道學者也聖賢之道發爲文章
而博學宏詞古文詩賦之作亦皆黼黻太平輝煌治理
者也

皇上天縱生知道全德備諸臣幸被

光華無不踴躍奮勵求爲有用之學微臣敢請

欽定條規嗣後新選翰林入館之初卽分經學文學二途願爲經學者卽以經書性理教其誦習而凡館課及散館皆以經書性理命題願爲文學者卽以古文詩賦教其誦習而凡館課及散館皆以古文詩賦爲試則諸臣得專心誦習而通經學道之彥濟濟奮興博學能文之英翩翩蔚起矣伏乞

皇上睿鑒施行謹

奏

請羅欽順從祀孔廟摺

雍正二年

爲恭請崇祀正儒以光盛典事欽惟我

皇上纘膺寶歷卽褒崇孔子五代加封王爵隆儒重道
互古未有臣查明儒江西有羅欽順者德備諸躬道可
淑世凡天人性命之理仁義道德之旨靡不研究其蘊
其生平學術皆本躬行心得體驗親切實爲後之學者
所共遵守至辭免吏部尙書閉戶潛修其恬靜之風又
爲當時所共推服臣謹按欽順之學實得程朱正脈且
有發明之功其立身高潔年踰八十始終一節如從祀

學宮洵可仰副

皇上隆儒重道之至意儻臣言可採乞

敕下內閣九卿詳議施行謹

奏

聖人可學而至論

客有問余曰聖人可學而至乎余應之曰可曰何由知其可也曰三代而上言聖者必曰堯舜孟子曰堯舜之道孝弟而已矣三代而下言聖者必曰孔子曾子曰夫子之道忠恕而已矣今與人言堯舜孔子則震而驚之以爲不能爲及與之言孝弟忠恕則忽而易之以爲不足爲此聖人之所以鮮也世之不知學者無論矣稍知學者率皆求之高遠或且索之幽深探奇搜異日從事於不可究極之域以炫耀於人其爲學也愈難其去聖也愈遠卽有一二好修之士知慕聖學矣乃口談道德

而念切紛華言稱先王而行同流俗無怪乎爲知者所
非笑而不知者且得藉爲口實也旨哉程子之言曰言
學便以道爲歸言人便以聖爲歸蓋聖之所以爲聖祇
此倫理之克盡而已天下同此倫理根於性爲仁義禮
智之德發於情爲惻隱羞惡辭讓是非之端見於事爲
君臣父子夫婦兄弟朋友之常此人之所以異於禽獸
而聖之所以與我同類也聖賢千言萬語諄諄告誡無
非欲人盡倫理以成人人旣成而聖亦不外是矣誠能
於日用之閒入則孝出則弟事事本之以忠而行之以
恕去其不如堯舜孔子者求其所以如堯舜孔子者則

亦堯舜孔子而已矣尙何聖人之不可學哉孟子曰堯
舜與人同耳又曰乃所願則學孔子也使不可學而至
也孟子豈欺我哉

與毛心易書

昨舟過毘陵匆匆而別未獲盡叩其蘊用是悵然竊意
近世學者皆爲舉業計耳足下謝絕舉業一心聖賢之
學誠近今所難得舟中讀延陵書院會語亦多中道之
言獨是揭格物爲宗旨予不能無疑夫格物者窮理之
謂也朱子論爲學工夫曰主敬以立其本窮理以致其
知反躬以踐其實此三者乃爲學之切要工夫今以格
物爲宗旨予意若不主敬以立其本是無本之學而學
爲雜學矣若不反躬以踐其實是用無用之體而體爲虛
體矣聖賢之學由本以及末明體以達用內聖外王備

於一身用行舍藏運於一心而謂一格物遂足盡聖賢之工夫乎而謂一格物遂足滿聖賢之分量乎程子曰涵養須用敬進學則在致知是格物之前尙有主敬之功又曰學之道必先明諸心知所往然後力行以求至薛文清公曰讀書不體貼向自己身心上做工夫雖讀盡古今天下之書亦無益也是格物之後又有實踐之功安得以一格物盡之哉主敬以立其本窮理以致其知反躬以踐其實聖人復起不易其言別立宗旨奚爲也

答陳玉立書

予才淺學疏過蒙不棄辱賜教益感佩曷可言喻獨是足下所學之妙見道之速予有不能無疑者昔羅整菴先生自幼不識禪學在京師遇一老僧訪求心要遂爲之構思徹夜不寐一日攬衣將起恍然有悟流汗通體證之禪書若合符節自以爲至奇至妙天下之理無以加於此後取五經四書濂洛關閩諸書讀而玩之漸復有疑久之喟然歎曰昔兩程子張子朱子早歲皆嘗學禪已究其底蘊及於吾道有得大悟其非乃知前所見者此心虛靈之妙而非性也遂發憤卒業追悔前非年